



EBBES UFF PELZISCH

ebbes

PALATIA



SPIELE

MIDD WAS WÄRR'DEN GSCHBIELD?

75 Schbielkaade

in de Faawe blau, braun, gelb, grün unn
rod, jeweils midd 1 – 15 druff



15 Zahlebeschdimmerkaade

aa midd 1 – 15 druff



5 Faabbeschdimmerkaade

in de Faawe blau, braun, gelb, grün unn rod



5 Werdungkaade

in de Faawe rosa, grau, orange, schwarz
unn weiß




1 Schbielbredd zum Beschdimme
unn zum Rigge funn de Pungde



5 Holzscheiwe

in de Faawe rosa, grau, orange,
schwarz unn weiß



FÄRR ALLE HOCHDEITSCHÉ:

Dess pälzische Wörsche **ebbes** heesd im Hochdeitsche **etwas**.

UM WAS GEEHD'SENN BEI DEMM SCHBIEL?

Jeder Schbieler versuchd, in soine Schdisch än Haufe Plus- und wennisch Minuspunge zu sammle. Am Aafang wees awwer känner, welli Kaadefaab Plus- odder Minuspunge bringd.

Am Aafang funn jedere Schbielrund wärn fünf Schbielkaade bestimmd, die's Zünglein aan de Wooch sinn. Wann die nämlich ausgeschbiel wärn, wärn die Faawe funn denne ausgeschbielde Kaade zu **Drumb, Plus, ebbes, Minus** odder **Nix** beschdimmd, je noochdem, wann se gschbiel wärn. Langsam awwer sicher lüfded sich dess Gehoimnis unn jeder versuchd nadierlich so zu schbiele, dass'es färr ihn am beschde laafd. Am Schluss funn ännere Rund wärn die Plus- unn Minuspunge uff'em Schbielbredd geriggd, Pluspunge naddierlich inn de Palz, Minuspunge naddierlich außerhalb funn de Palz. Wer am Schluss am weidschde vonne iss, hodd gewunne!

Zuerschd wärn die Schbielregle färr's Basisschbiel ergleerd, midd denne märr glei aafange kann zu Schbiele. Do denooch wärn 2 Erweiderunge beschriwwe, die märr nooch Believe midd'em Basisschbiel kombiniere kann. Ganz hinne schdehd die Schbieregell ferr zwee.

SO WÄRD EBBES GSCHBIELD

AUSSCHBIELE FUNN SCHDISCH:

„**ebbes**“ iss ä Schdischkaadeschbiel, wo iwwer mehrere Schbielrunde gschbielld wärd. In jedere Schbielrund wärn 10 Schdisch gschbielld. Färr de erschde Schdisch schbielld de Schdardschbieler ä beliewisch Kaad offe uff de Disch. Im Uhrzeigersinn muss jeder Schbieler genau **ä Kaad** offe uff de Disch legge. Domidd iss de erschde Schdisch gschbielld.

AUSSCHBIELREGLE:

***Faabzwang:** Die ausgschbielde Kaade missen all die Faab funn de zuerscd gschbielde Kaad hawwe. Hodd än Schbieler nedd so ä Kaad kann'er endwedder drumbe odda ä Kaad abschmeise.*

***Drumbe:** Wann im Verlauf funn ännere Schbielrund die Drumbfaab schunn beschdimmd worre iss (noochgugge bei Drumb beschdimme), kann än Schbieler ä Kaad in de Drumbfaab schbiele. Weil die Drumbfaab heeher iss als alle onnere Faawe, griggd der, wo ä Kaad in den Drumbfaab gschbielld hodd, de Schdisch. Märr muss awwer nedd drumbe, märr kann a ä Kaad abschmeise.*

Ä Kaad abschmeise:** Hodd än Schbieler kä Kaad funn de zuerscd gschbielde Faab unn kann oder will'er nedd drumbe, kann'er irgend ä Kaad schbiele (= „Kaad abschmeise“). **Nedd vergesse! Was uff'em Disch liggd, hodd de Disch g'fresse!

Denn Schdisch griggd der, der in de ausgschbielde Faab die heegschd Kaad gelegd hodd, außer es iss gedrumbt worre, dann griggd der midd de heegschde Drumbkaad de Schdisch. Wer ä Kaad abschmisse hodd, hodd bei der Schdischvergaab nix zu melde! Der wo den Schdisch gewunne hodd leggd alle ausgschbielde Kaade verdeggd vor sich uff de Disch unn schbielld die erschd Kaad färr de neggschde Schdisch. Dess wärd so lang gemachd, bis alle Kaade gschbielld worre sinn.

DESS BASISSCHBIEL:

VOR'M SCHBIELE RISCHDE:

Funn de 75 Schbielkaade wärn je nooch Middschbieler folgende Kaade gebrauchd:

- 3 Schbieler: Spielkaade in jedere Faab mit de Werde 1 - 6 (= 30 Kaade)
- 4 Schbieler: Spielkaade in jedere Faab mit de Werde 1 - 8 (= 40 Kaade)
- 5 Schbieler: Spielkaade in jedere Faab mit de Werde 1 - 10 (= 50 Kaade)

Die Spielkaade wärn guud gemischeld unn gleichmäßisch an die Schbieler verdeeld. Die Kaade die nedd gebrauchd wärn kummen zurigg in die Schachdel.

Funn de 15 Zahlebeschdimmerkaade wärn die Kaade mit de Werde 1 - 5 verdeggd gemischeld, als verdeggder Schdabel uff de Disch geleggd unn die owwerschd Kaad offe druffgeleggd. Alle annere Zahlebeschdimmerkaade wärn zurigg in die Schachdel geleggd.

Dess Schbielbredd unn die Farbbeschdimmerkaade wärn offe uff de Disch geleggd.

Jeder Schbieler nimmt sich ä faawischi Holzscheib unn ä Werdungskaad, die in de Faab zu de Holzscheib bassd, unn sedzd die Holzscheib uffs Schdardfeld uff'em Schbielbredd.

Färr die erschd Schbielrund wärd der Schbieler zum Schdardschbieler, der zuledschd ebbes* gschbieldd hodd.

*falls'ers vergesse habbd: **ebbes = etwas**

BESCHDIMME FUNN DRUMB, PLUS, EBBES, MINUS UNN NIX:

In alle Schbielrunde wärd zuerscht de **Drumb**, dann **Plus**, **ebbes**, **Minus** unn zum Schluss **Nix** beschdimmd, unn zwar soo, wie's uff'em Schbielbredd schdehd, schää funn lings nooch rechds

I. **Trump(f)/Atout**

II. **Plus**

III. **ebbes**

IV. **Minus/Moins**

V. **nix**

Färr die erscht Schbielrund duud de offe liegende Kaadewerd funn de Zahlebeschdimmerkaade beschdimme, welli Kaadefaawe zu **Drumb**, **Plus**, **ebbes**, **Minus** unn **Nix** wärn.

I. DRUMB BESCHDIMME:

ann die erscht Kaad mit dem Werd ausgeschbiel worre iss, die de gleiche Werd wie die offe liegend Zahlebeschdimmerkaad hodd, wärd die Faab funn deere Kaad **soford** färr de Reschd funn dere Schbielrund Drumb. Die Drumbfaab wärd midd de bassende Faabbeschdimmerkaad unnerhalb fumm Schbielbredd maggierd.

BEISCHBIEL: Färr die erscht Schbielrund iss die Zahlebeschdimmerkaad midd'em 1er druff uffgedeggd worre. De Schdardschbieler schbiel de blaue 10er unn de neggsche Schbieler de blaue 1er. Do demidd wärd blau soford zum Drumb, weil de ausgeschbielde blaue 1er de gleiche Werd wie die offe liegend Zahlebeschdimmerkaad hodd. Midd de blaue Faabbeschdimmerkaad wärd de Drumb unnerhalb fumm Schbielbredd maggierd. Ab soford iss blau färr de Reschd funn deere Rund Drumb.


I. **Trump(f)/Atout**

II. **Plus**

III. **ebbes**

IV. **Minus/Moins**

V. **nix**



II. PLUS BESCHDIMME:

Wann die Drumbfaab feschedgeleggd iss, wärd als neggschdes die Faab beschdimmd, midd der märr Pluspungde grigge kann. Dess kann im gleiche Schdisch bassiere, wo de Drumb beschdimmd worre iss! Wann nämlich die 2. Kaad midd'em Werd funn de offe liegende Zahlebeschdimmerkaad ausgeschbiel wärd, wärn alle Kaade in deere Faab zu Pluspungde unn bringen am Schluss funn ännere Schbielrund **ään Pluspungd pro Kaad**. Die Kaadefaab funn de Pluspungde wärd midd de bassende Faabbeschdimmerkaad unnerhalb fumm Schbielbredd maggierd.

BEISCHBIEL: De Gewinner fumm ledschde Schdisch schbiel de grüne 10er, weil'er määnd, dass dann de grüne 1er falld unn die grüne Kaade dann Pluspungde gewwen. Awwer de neggschde Schbieler hodd gar kä grüne Kaade unn schmeissd de gelwe 1er ab. Sofford wärn midd de gelwe Faabbeschdimmerkaad unnerhalb fumm Schbielbredd die Pluspungde maggierd. Am Schluss funn dere Rund griggd märr färr alle gelwe Kaade in soine Schdisch 1 Pluspungd pro Kaad.



III. EBBES BESCHDIMME:

Wärd die 3. Kaad midd'em Werd funn de offe liggende Zahlebeschdimmekaad ausgeschbiel, wärd die Faab funn dere Kaad soford zu ebbes und midd de endschbrechende Faabbeschdimmerkaad unnerhalb fumm Schbielbredd maggierd. Am End funn deere Schbielrund griggen die Schbieler midd de meischde unn de wenigschde Kaade in deere Faab **kää Pungde (die wenigschde Kaade können aa kää Kaade soi!)**. Alle annere Schbieler griggen **3 Pluspungde**, unn zwar jeder **äänzeln!**

IV. MINUS BESCHDIMME:

Wärd die 4. Kaad midd'em Werd funn de offe liggende Zahlebeschdimmerkaad ausgschbiel, wärn alle Kaade in deere Faab soford zu Minuspungde unn die Kaadefaab funn de Minuspungde wärd midd de entschbrechende Faabbeschdimmerkaad unnerhalb fumm Schbielbredd maggierd. Am Schluss funn deere Schbielrund zeeld jedi Kaad funn deere Faab 1 Minuspungd.

V. NIX BESCHDIMME:

Weil noch'em Beschdimme funn de Minuspungde nur noch ä Faab iwwrisch iss, wärd genau die Faab audomadisch zu Nix beschdimmd unn unnerhalb fumm Schbielbredd midd de endschbrechende Faabbeschdimmerkaad maggierd. De Schbieler midd de meischde Kaade in de Nix-Faab därf in de neggschde Schbielrund de Schdardschbieler beschdimme. Wann ä paar gleich viel Nix-Kaade hänn, wärd der zum Schdardschbielerbeschdimmer, der die heegschd Äänzelkaad in de Nix-Faab hodd.

WISCHDISCH! Fallen in äm Schdisch mehrere Kaade, die wo den Werd funn de agduelle Zahlenbestimmerkaad hänn, wärd dess schää de Reih noch gemachd, unn zwar in der Reihfolg, wie die Kaade gschbiel worre sinn!

FÄRR WAS GIBT'S WAS?

Wann alle Kaade ausgeschbiel worre sinn, wärd abgerechend! S'iss äfacher, wann märr die Kaade in soine Schdisch nooch Faawe sordierd.

Agduelli **Drumb-Faab**: Kaade in den Drumb-Faab zeehlen nix.

Agduelli **Plus-Faab**: Jedi Kaad in de Plus-Faab zeehld 1 Pluspungd.

Agduelli **ebbes-Faab**: Die Schbieler mit de meischde unn de wenigschde Kaade in de ebbes- Faab griggen kää Pungde (die wenigschde Kaade können aa kää Kaade soi!). Alle annere Schbieler griggen 3 Pluspungde, unn zwar jeder äänzelne funn denne.

BEISCHBIEL: Am End funn äänere Schbielrund mit 5 Schbieler hänn die folgende Kaade:

De Alex und de Haui hänn kää Kaade in de ebbes-Faab, de Jesko hodd 2 Kaade in de ebbes-Faab, de Bernhard hodd 3 Kaade in de ebbes-Faab und de Paul hodd 5 Kaade in de ebbes-Faab. De Alex und de Haui hänn die wenigschde Kaade in de ebbes-Faab unn griggen kä Pungde. De Paul hodd die meischde Kaade in de ebbes-Faab unn griggd a kä Pungde. De Jesko und de Bernhard griggen alle zwee 3 Pluspungde..

Agduelli **Minus-Faab**: Jedi Kaad in de Minus-Faab zeehld 1 Minuspungd.

Agduelli **Nix-Faab**: De Schbieler mit de meischde Kaade in de Nix-Faab därf in de neggschde Schbielrund de Schdardschbieler beschimme. Bei Gleichschdand zeehld die heeher Äänzelkaad funn de Nix-Faab.

Die Plus- und Minuspungde funn jedem Schbieler wärn uff'em Schbielbredd geriggd.

WEIDERE SCHBIELRUNDE:

Am Aafang funn ännere naie Schbielrund wärd die offe liegend Zahlebeschdimmerkaad midd de Vorderseid nooch owwe unner de Kaadeschdabel midd de Zahlebeschdimmerkaade gschoowe. Do denooch wärd die owwerschd Kaad funn dem Schdabel uffgedeggd unn offe uff de Schdabel geleggd. Dess iss die nai Zahlebeschdimmerkaad färr die Schbielrund, die jedzd kummd.

Die Faabbeschdimmerkaade wärn offe newer'm Schbielbredd hiegeleggd. De linge Nachbar funm ledschde Kaadegewer mischeld alle Kaade unn deeld an die Mitschbieler alle Kaade gleichmeeßisch aus. Noochdem sich alle Schbieler ihr Kaade oogeguggd hänn, därf der Schbieler, der in de ledschde Schbielrund die meischde Kaade in de Nix-Faab g'habbd hodd, de naie Schdardschbieler beschdimme. Er därf sich aa selwer beschdimme. De Schdardschbieler fangd ä naii Rund aa, in dem'er äfach ä Kaad ausschield.

WANN ISS'ES FÄRDISCH?

Nooch 5 Schbielrunde iss Feierowend, wann nämlich de Schdabel midd de Zahlebeschdimmerkaade ämool durschgschield worre iss. Gewunne hodd dann der, der am weidschde vonne iss.

S'gibd a noch 2 Variande, die glei ergleerd wärn unn die midd'em Basisschbiel beliewisch kombinierd wärre können.

SCHBIELREGEL FERR 2 PERSONE:

Funn de Schbielkaade brauchd märr die Kaade wie färr ää Schbiel midd 3 Persone (jeweils in 5 Faawe die Kaade funn 1 - 6). Beim Verdeele funn de Kaade hoggen die Schbieler wie folgd im Uhrzeigersinn:



Figgdiver
Middschbieler



Schbielpartner



Kaadegewwer

De figgdive Middschbieler
hoggd also immer **lings**
fumm Kaadegewwer!

Färr de figgdive Middschbieler wärrn die Kaade wie folgd hiegeleggd:

Die erschde 5 Kaade wärrn verdeggd neewernanner hiegeleggd. Die neggschde 5 Kaade wärrn offe funn lings nooch rechds uff die verdeggd liggende Kaade druffgeleggd.

Die Schbielregle sind wie fumm normale ebbes, d.h. färr de figgdive Middschbieler:

- Wärd ää Farbe aagschbiel, muss die Faab aa bediend wärrde.
- Liggd nur ää Kaad funn deere Faab beim figgdive Midschbieler, wärd mit deere Kaad bediend.
- Liggden mehrere Kaade funn de aagschbielde Faab aus, wärd immer die Kaad funn deere Faab genumme, die am weideschde **lings** offe ausliggd.
- Liggd funn de aagschbielde Faab kää Kaad beim figgdive Middschbieler aus, wärd immer die Kaad gschbiel, die am weideschde **lings** offe ausliggd.
- Liggd nooch ääm gschbielde Schdisch beim figgdive Middschbieler ää Kaad verdeggd aus, wärd die Kaad vorm Ausschbiele zum neggschde Schdisch umgedrehd.
- Hodd de figgdive Middschbieler ään Schdisch gemachd, fangder de neggschde Schdisch immer midd de am weidschde **lings** liggende offene Kaad aa.

Die Pungde wärrn so wie bei ääm 3-Persone-Schbiel gezeehld.

VARIANDE 1 "SCHBIELE MIT MEHR KAADE":

Bei deere Erweiterung werd äfach midd mehr Kaade gschbiel. Dess machd dess Schbiel noch schbannender, weil's länger dauerd, bis die Beschdimmerkaade fallen. Do hodd märr dann effder Schdische vor sich ligge, wo märr nedd genau wees, was dess mool schbeeder wärd.

Je noochdem wie viel Schbieler middschbielen, wärn färr die Erweiterung noch mehr Kaade gebrauchd:

3 Schbieler: Funn de Kaade in jedere Faab noch die Werde 7 9 (= 15 Kaade)

4 Schbieler: Funn de Kaade in jedere Faab noch die Werde 9 12 (= 20 Kaade)

5 Schbieler: Funn de Kaade in jedere Faab noch die Werde 11 15 (= 25 Kaade)

Ansunschde gelden die gleiche Schbielregle wie beim Basisschbiel.

VARIANDE 2 "BESCHDIMMERKAADE AUSSUCHE":

Bei deere Erweiterung dürfen sich die Schbieler, im Gegesatz zum Basisschbiel, die Beschdimmerkaade selwer aussuche! Dodurch griggen die Spieler mehr Oiflussmeglichkeide uff de Schbielverlauf.

Bis uff die folgende Ännerunge gelden die Schbielregle fumm Basisschbiel:

VOR'M SCHBIELE RISCHDE:

Funn de Zahlebeschdimmerkaade brauchd märr die Kaadewerde, die denne Kaadewerde endschbrechen, die an die Schbieler verdeeld wärn.

BEISCHBIEL: Bei 3 Schbieler, die dess Basisschbiel midd de erschde unn de zwedde Erweiterung kombiniere wollen, wärn funn de Kaade in jedere Faab die Werde 1 – 9 gebrauchd. Färr die Variande wärn also a Zahlebeschdimmerkaade midd de Werde 1 – 9 gebrauchd!

Alle Zahle- und Faabbeschdimmerkaade wärn **offe** in die Midd fumm Disch geleggd, dass se jeder guud sehe kann!

SCHBIELABLAUF:

De Schbieler **lings** fumm Schdardschbieler suchd sich in de Midd fumm Disch genau ä Faab-beschdimmerkaad unn ä Zahlebeschdimmerkaad aus unn leggd se offe vor sich uff de Disch.

Dess muss nedd ubedingd äni funn denne Kaade soi, die'er uff de Hand hodd!

BEISCHBIEL: De Schbieler lings fumm Schdardschbieler nimmd sich die Zahlebeschdimmerkaad midd'em 5er druff unn die grün Faabbeschdimmerkaad. In deere Schbielrund iss de grüne 5er äni funn denne Kaade, die Drumb, Plus, ebbes, Minus und Nix fesdleggen.



Aaschließend nimmd sich de neggschde Schbieler im Uhrzeigersinn jeweils äni funn de iwwrisch gebliwene Zahle- und Faabbeschdimmerkaade funn de Midd fumm Disch unn leggd se offe vor sich ab. Dess wärd reihum so lang gemachd, bis alle 5 Faabbeschdimmerkaade offe vor de Schbieler liggen.

ACHDUNG: Je noochdem, wie viel Schbieler midschbielen, können a 2 Faabbeschdimmerkaade vor äm Schbieler ligge!

Nochdem alle färdisch mi'mm Aussuche sinn fangd de Schdardschbieler aa unn schbiel die erschd Kaad aus.

BESCHDIMME FUNN DRUMB, PLUS, EBBES, MINUS UNN NIX:

Wann in äm Schdisch die erschd Kaad mit dem Werd und der Faab gschbiel wärd, die äner vor sich ligge hodd, werd die Faab funn deere Kaad färr de Reschd funn deere Schbielrund Drumb. Die Drumpffaab wärd glei mit de bassende Faabbeschdimmerkaad unnerhalb fumm Schbielbredd maggiert. Die Zahlebeschdimmerkaad, die zu deere Faabbeschdimmerkaad gekehrd hodd, wärd nimmi gebrauchd unn verdeggd uff die Seid geleggd.

Genauso wärd in deere Rund a noch **Plus, ebbes, Minus unn Nix** beschdimmd.

WEIDERE SCHBIELRUNDE:

Vor ännere naie Schbielrund wärn widder alle Zahle- und Faabbeschdimmerkaade, a die aus de ledschde Rund, offe in die Midd fumm Disch geleggd.

WONN ISS'ESS FÄRDISCH?

Dess Schbiel iss färdisch, wann äns funn denne drei Sache bassiert:

- a) Wann nooch ännere Schbielrund än Schbieler dess Zielfeld uff'em Schbielbredd erreicht hodd,
- b) odder wann nooch ännere Schbielrund än Schbieler dess Dabbscheedel*-Feld erreicht hodd,
- c) odder nooch ännere Rundezahl, die vorher ausgemachd worre iss (es sollden awwer mindeschdens 5 Runde geschbiel wärr).

* Dabbscheedel brauch isch Aisch als Pälzer wohl nimmi zu ergleere!



© 2017 PALATIA SPIELE, Klaus Geis
3. Auflage
Kohlhof 4, 67117 Limburgerhof
www.palatia-spiele.de
Made in Germany